


EDISI **07**
MEI - AGUSTUS
2017

swaratama

Mbangun Kuncaraning Basa, Sastra, lan Budaya Jawa

DITERBITAKE
DENING
BALAI BAHASA
JAWA TENGAH



KOMIK
"Supatane
Begawan
Sukra 6-7"

Grenengan Irul S. Budianto

**Wong Jawa
Ilang Jawane**

KABUDAYAN
**Poligami Raja-Raja
ing Tanah Jawa**

GEGURITAN
"Editorial
Kencar-Kencar"



Aja Lali Batik Cuwiri

Batik Cuwiri kuwi sawijining corak batik
sing wernane nganggo zat kelir soga alam.
Batik iki biasane digunakake kanggo semekan lan kembenan,
uga kerep dienggo ing upacara Mitoni.

Pesenan iki diaturake dening:

BALAI BAHASA JAWA TENGAH

Blencong

Sempulur

Dening: Keliek SW

Kalebu ewone tembung sing wis arang keprungu jroning pirembungan padinan. Biyasane kawuwuhan tembung pangajab “muga-muga” tumrap saweneh kahanan, Satemah darbe daya mirunggan.

REKENE wis sawetara wektu dheweke nglembara menyang kutha saperlu ngupadi jati dhiri sarta luru rejeki golek pangupajiwa. Saiki dheweke bisa mulih ndesa. Lega rasaning ati nyipati wong tuwane sakloron katon waras-wiris ora kurang sawiji apa. Semono uga para sedulur lan sanak-kadang. Nanging, dheweke angluh kegawa rasa trenyuh nalika ngawuningani Mbah Putri kawistara ringkih awit saya ngunduri sepuh. Mbah Putri dirangkul, dheweke mingseg-mingseg, wetuning eluh ora kuwawa disigeg.

Sawise bisa nata rasaning ati, dheweke nuli crita ngenani pengalamane nglembara ana kutha, pamrihe supaya Mbah Putri ora kagungan rasa sumelang. Semboyan “mangan ora mangan waton kumpul” wis dudu jamane. Nyatane Mbah Putri midhangetake kanthi polatan bingar. Mungguhe Mbah Putri, adhep-adhepan klawan saweneh wayahe kang nedheng nyambangi kuwi prasasat kaya impen wayah awan. Ngerti-ngerti si putu wis diwasa, bregas-jatmika kathik tatag nyuwak gumuruhe kutha, tangguh ngadhepi wilet ing urip lan panguripan. Sing gawe mongkoge Mbah Putri, si putu ora nyimpar adat lan tata krama.

Rinasa cukup anggane ngudhal rasa kapang, dheweke banjur pamit. Sadurunge menyang, dheweke ngrogoh kanthongan clana, ngetokake dhompot lan ndudut dhuwit lembaran abang, ditlesepake ing regemane Mbah Putri. Sabanjure kawetu ucape, “Mbah, menika minangka tandha tresna saking ingkang wayah. Kula aturi nampi sinaosa gunggung boten mingsra.” Mbah Putri legeg. Penggalih sumendhal. Paningale sing sakawit sumunar tundhone kaca-kaca kumembeng waspa. Pangandikane Mbah Putri keprungu geter, “Putuku bocah bagus, daktampa pawewehmu. Simbah nedha nrima ya, Ngger. Dakdongakake muga-muga sliramu tansah manggih rahayu, sempulur pakaryanmu, sempulur rejekimu.”

Patemon antarane simbah klawan wayah yektine bisa ditemu ana sadhengah papan, sadhengah kulawarga, sadhengah kahanan. Nanging, mesthine, swasana kebatinane beda-beda. Gegambaran ing ndhuwur tinemu jroning bebrayan Jawa lan kawistara isih ngugemi adat lan tata

krama Jawa. Bok menawa sing diarani adat lan tata krama Jawa wektu iki wis ngalami owah-owahan ora kaya wektu-wektu kepungkur, lan istingarah ing wektu-wektu sabanjure uga tansah ngalami owah-gingsir cundhuk karo mobah-mosiking kahanan. Para ulama lan para pinter wis kepara suwe ngendika: pancen ginaris ing pesthi lamun apa wae kang ana ing kurepe langit lumahe bumi iki ora langgeng. Sing langgeng utawa lestari ora liya kejaba owah-owahan iku dhewe.

Gegambaran patemon antarane simbah klawan wayah kasebut wigatine nyenthang anane tembung “sempulur” kang kawetu saka pangandikane Mbah Putri. Tembung “sempulur” manut paramasastra kalebu jinise tembung kahanan, nanging wis arang-arang keprungu jroning pirembungan padinan. Salugune tembung “sempulur” nduweni teges: “mulur, dawa, panjang, awet”. Nanging jroning konteks pangandikane Mbah Putri marang si wayah, sawise kawuwuhan tembung pengarep-arep “muga-muga”, tembung mau maknane ngluwihi teges salugune. Tembung “sempulur” tegese ora mung saderma mulur nanging “mulur lan mupangati”; ora mung angger dawa nanging dawa sing “murakabi”; ora mung waton panjang nanging “panjang tur mbarokahi”; ora mung awet nanging “awet sing muwuh undhake ajining dhiri”.

Tembung “sempulur” kang kawuwuhan tembung pangajab “muga-muga” jroning konteks kahanan tinamtu kurang trep lamun ditegesi *akeh* utawa “turah-turah” manut ukuran jumlah; nanging luwih mathis yen ditegesi “cukup” utawa “samadya nanging tumanja”. Magepokan karo bab iki, patrap “lila” utawa “iklas” antarane sing memuji lan sing kapujekake darbe kalungguhan wigati. Pungkasane, ngrembug prekara wigatine tembung “sempulur” kang kawuwuhan tembung pangajab “muga-muga” ing purwane lan sinartan patrap lila utawa iklas, kawawas pantes dadi tetimbangan ing satengahé jaman globalisasi kang condhong marang idheologi materialisme-pragmatis. ☺


Ngopeni Dialek ing Jawa Tengah

WARA-WARA

Redaksi nampa tulisan saka para maos. Tulisan bisa kakirimake liwat email majalah.swaratama@gmail.com utawa dikirim menyang alamat redaksi, Balai Bahasa Jawa Tengah Jalan Elang Raya nomor 1, Mangunharjo, Tembalang, Semarang 50272. Tulisan kang kapacak bakal entuk bebungah saka Balai Bahasa Jawa Tengah.

swaratama
majalah basa jawa

Mbangun Kuncaraning Basa,
Sastra, lan Budaya Jawa



Dhipundhut saka gambar
sketsa "Borobudur" karyane
Yudi Mahaswanto (Semarang)

BALAI

Bahasa Jawa Tengah minangka instansi kang duwe kewajiban nguri-nguri lan ngrembakakake basa Indonesia lan dhaerah rumangsa duwe jejibahan melu ngumut *dialek-dialek* mau. Mula, ing majalah iki diwenehi wadhah kanggo tulisan saka logat-logat kuwi. Salawase iki, nembe logat Banyumas lan Tegal kang bisa kapacak. Redaksi duwe pangarep-arep ing *edisi* sabanjure ana tulisan saka logat liyane.

Edisi iki redaksi nampa artikel saka sedulur Prayitno. Artikel mau ditulis nganggo basa Jawa logat Kudus. Mesthi wae iki kabar kang nyenengake, amarga kuwi ateges muwuhi maneka warna ragam *dialek* ing majalah iki. Yen sadurunge wis ana rubrik "Banyumasan" lan "Tegalan", ing *edisi* iki tambah maneh yaiku rubrik "Kudusan". Kanthi mangkono cita-cita *Swaratama* dadi oase kanggo logat-logat ing Jawa Tengah enggal kelakon. Angen-angen redaksi sabanjure,

Ing
Swaratama edisi
kapisan redaksi matur
manawa ing Jawa Tengah
akeh dhaerah kang duwe
dialek utawa logat
dhewe.

muga bakal ana kang ngirimake tulisane nganggo maneka warna logat liyane, kayata Semarang, Pathi, Rembang, Wonosobo, lan tlatah liyane.

Mesthi wae rubrik kang wis ana uga tetep dikirimi artikel, dadi "Banyumasan", "Tegalan", lan "Kudusan" ajeg ngrenggani majalah *Swaratama*. Sokur manawa enggal disusul rubrik-rubrik *dialek* liyane.

Nanging, kanggo mujudake pangangen-angen mau, mesthi wae redaksi ora bisa makarya dhewe. Redaksi mbutuhake pambiyantu saka para sedulur kabeh. Para maos kersoa ngirimake tulisane marang redaksi. Muga-muga majalah iki terus macak artikel-artikel mangkono kanggo terbitan ing dina-dina candhake. Nuwun.

Kustri Sumiyardana
Pemimpin Redaksi

SUSUNAN REDAKSI

Penanggung Jawab : Drs. K.R.T. H. Pardi Suratno Sastranagara. M.Hum ~ **Pemimpin Umum:** Drs. Suryo Handono, M.Pd ~ **Pemimpin Redaksi:** Kustri Sumiyardana, S.S., M.Hum ~ **Sekretaris Redaksi:** Sunarti, S.S., M.Hum ~ **Redaktur Pelaksana:** 1. Yan Tohari, 2. Widiyartono ~ **Redaktur :** 1. Bambang Sulanjari, S.S., M.A, 2. Mochammad Fikri, S.S, 3. Tri Wahyuni, S.S ~ **Reporter:** 1. Drajat Agus Murdowo, S.S., M.A, 2. Triman Laksana ~ **Desain grafis dan Tata Letak:** Akhid Anshori Setiawan, A.Md ~ **Keuangan:** Langit Ismoyo Putro, M.H ~ **Sirkulasi:** 1. Lely Siti Fatimah, S.E., M.Si, 2. Agus Sulistiyo ~ **Desain Produksi:** Handry TM.



foto: handry tm

Seni terbang "ditabrakke" karo seni kendang, mujudake rampak tetabuhan kang rancak lan elok wirama.

Seni Terbang Kudus ing Palembang

Foto gelaran sing kapacak ana ing ndhuwur kuwi sejartine ora mligi pagelaran seni terbang. Nanging kelompok terbang kuwi dadi siji karo Kelompok Seni Tradisional saka Kabupaten Kudus nalika tampil ing Palembang durung suwi iki.

KABUPATEN Kudus sengaja ngutus para seniman panggung supaya nggelar sawijining cerita rakyat sing mratelakake menawa daerah kasebut wiwit biyen tentrem lan rukun. Ora sembarangan, kelompok drama panggung kuwi uga tampil ing ngarepe para petinggi kaya dene menteri lan pejabat nasional.

Nyritakake swasana kerukunan warga sing asale saka maneka-warna suku lan keyakinan. Dumadakan ana rubeda sing sengaja ngedu masyarakat supaya ora sayuk rukun. Nanging kanti tekad lan niat sing gedhe, para warga ora gigrik karo pengaruh ala kuwi.


Model pituture meh persis karo pagelaran sampakan, dene iringan musike sengaja dipilih cengkok terbang pesisiran Jawa Tengah. Elok lan nengsemake. **uut**

Agul-agulane Piknik Negara Kudus Menara: Ziarah, Sujarah, lan Kabudayan

Sapa sing hurung ndhenger negara utawa Kutha Kudus? Mbok-a hurung tau ngedhak, namik sak ora-orane tau ndhungu arane negara sing mlebu tlatah Provinsi Jawa Tengah iku. Apa neh kaya rejaning jaman sekiye, odhak sithik jeragan Kudus sing jamak bakulan karo negara-negara sebrang sak-ubengane ndonya.



8



12

Banyumasan Alquran Deterjemahna Nganggo Basa Banyumasan

Siki Basa Banyumasan selot deakoni anane. Buktine siki Kementerian Agama wis mbabarna Al-Quran nganggo Basa Banyumasan. Al-Quran terjemahan kiye wis *dilaunching* daning Mentri Agama, Lukman Hakim Saifuddin ana kantore tanggal 3 Desember 2015.


16 Geguritan

Cerita Cekak

Asune Mabur Menyang Wuwungan

Dening: Budi Wahyono

“Maaf Kang, kowe ora balik ndesa? Mbakyu nakokake terus. Ketoke wis limang sasi awakmu ora mulih ya? Gery, anakmu ya wis gedhe... wis ajar mlaku. Ora kangen Kang?”



Swara Dwija

Tekad Nglestarekake Basa lan Aksara Jawa

Aksara Jawa iku salah sijining wujud budaya Jawa minangka perangan saka budaya Indonesia. Ora akeh bangsa ing donya iki kang duwe aksara dhewe, tuladhane aksara Latin, Hieroglyph, Arab, Cina, Jepang, lan India, kalebu aksara Jawa.

20

26

Wacan Bocah Buku Dongeng

Dening: Al Aris Purnomo

Agung nembe maca buku dongeng nalika telpun ing ruwang tengah muni. Agung mlayu banjur ngangkat telpun. Pranyata sing telpun Budhe Larti, awèh kabar kalamun kampunge Lik Warsidi nembe wae ketrajang banjir. Agung enggal ngaturke kabar mau marang bapak lan ibune.

22

Grenengan Wong Jawa Ilang Jawane

Nilai-nilai Jawa pancen ngandhut tuntunan kanggo nylarasake urip lan panguripan sing serasi lan harmoni. Nanging krana perkembangane jaman, nilai-nilai Jawa mau saiki kaya-kayane wis luntur.

32

Agul-agulane Menara: Ziarah,

Sapa sing hurung ndhenger negara utawa Kutha Kudus? Mbok-a hurung tau ngedhak, namik sak ora-orane tau ndhungu arane negara sing mlebu tlatah provinsi Jawa Tengah iku. Apa neh kaya rejaning jaman sekiye, odhak sithik jeragan Kudus sing jamak bakulan karo negara-negara sebrang sak-ubengane ndonya.

Rokok kretek, tipi uga bekakas elektronik liyane, lan dluwang uga orak kejaba sakbanjure kasile sing direka daya kaya arupa dluwang dhit, ogak muk kesuwur ndhok Nuswantara. Babakan penggean iku, sakngalam ndonya ngakoni kejadhukane Kudus. Mula ogak eram nek Negara Kudus ketok raja. Awit pabrik sing nggae bekakas sing kasebut kuwi, ngrangkul wong mberah dha mbutgae.



Piknik Negara Kudus

Sujarah, lan Kabudayan



foto Prayitno

Becak Wisata Menara

Hurung neh sawah sing setahun isa tandur ping telu, pari ping loro lan sepisan palawija. Iku kaya sawah sing orak kurang 5.000 hektare ambane ndhok Kecamatan Undaan, merga entuk oncoran banyu teka irigasi Wadhuk Kedungombo. Uga ijeh ana sawah tadhah udan lan tegalan sing isa


ditanduri pari gaga, tebu, janganan, pala kesempar, pala kependhem, lan pala gemantung, lan kebonan alas.

Penggean omahan sing jamak diarani UMKM uga isa diarani dadi pondhamen mbotgaene kawula mberah. Lan miturut Pemkab Kudus odhak kurang ana welasan ewu cacahé. UMKM iku ana sing nggae bordhir, bathik, lan uga sandhangan liyane. UMKM kuwi kaya orak ana matine, ngetokna nek wong Negara Kudus prigel lan weluk anggone ngayahi penggean.

Mula senjata tlatahe cilik, ambane kira-kira 422,21 Km² lan wargane kurang luweh cacahé 860 ewu jiwa, muk mengku sangang kecamatan sing sak-njerone ana 132 desa lan kelurahan, ogak eram nek ndadekna Negara Kudus ngedap-ngedapi. Lagek teka cukai rokok ae, Kudus sabendinane kasil nyetorna dhit kanggo Negara Nuswantara Rp 11 miliar. Kasunyatan mengkono ndudohna, lahapa Kudus sing panggonane kira-kira 50 Km ndhok Lor-Wetane Semarang, ketok luweh mencorong timbang kutha kana-kana.

Kabudayan Islam

Misuwure Kudus sekiye, merga ana pirang-pirang pabrik sing nggae bekakas rupa-rupa, iku kaya "sambungan tampar" karo Kudus sengen. Nyulohi utawa ngunekna sujarah Islam ndhok tlatah Jawa



Menara Kudus



BUKAK LUWUR MENARA

foto Dokumen Istimewa

Utawa babakan Wali Sanga abad 1415 Masehi, orak isa ogak ningalna Kudus.

Odhak muk hare-harene, blegere Menara sing ana ndhok Kudus Kulon negesna nek Negara Kudus ancen orak isa diuwal saka sujarah Islam ndhok Jawa. Ewoh-ndene ana sing haqul yakin nek bangunan Menara sing panggonane ndhok sak-ubengane Masjid Al Aqsa lan Pesarean Sunan Kudus iku, ogak kasile obah tangane Raden Djakfar Sodik.

Miturut para wicaksana kabudayan kaya Bin Subiyanto, Mukti Sutarman Espe, lan Subagiyo Reban, Menara tilasane kaum Hindhu. "Muk ancen, merga kawicaksanaan Sunan Kudus, Menara odhak dibrukna. Namik, kanthi wicaksanane Sunan Kudus, Menara didadekna salah sijine panggonan kanggo syiar Islam yaiku nuthuk jidhur lan kenthongan nek mlebu wayah salat, uga ngumandhangna adzan," ucape Bin Subiyanto njlentrehna.

Blegere Menara sing isa diarani orak kacek adoh teka Kulkul (Bali), digae teka abahan bata abang. Cathetan para wicaksana sujarah Islam, purbakala, lan buku babakan Wali Sanga utawa buku sing nyritakna Sunan Kudus Raden Djakfar Sodik, dedeke Menara sing teka bata abang 12 meter, nek dhuwure payonane 7 meter. Sikile (bangunan sing pol ngisor utawa lunasan pondhamen) gedhene persegi yaiku 10,6 meter, saya munggah awake Menara saya cilik.

Ana trap-trapane ndhok siseh kulon.

Masak lawoh iwak kebo cara bumbu jangkrik lan sega ndhok Menara Kudus Kulon/Pesarean Sunan Kudus. Angger wayah Bukak Luwur Pesarean Raden Djakfar Sodik 10 Muharram, atusan ewon sega nuk didhum kanggo para kawula.

Sengen ngantek sakhurunge tahun 1980 kawula mberah sakwayah-wayah isa munggah ngantek ndhuwur sing kedokokan jidhur lan kenthongan. Sekiye muk wong sing entuk izin teka pengurus YM3SK (Yayasan Masjid Menara dan Makam Sunan Kudus) sing isa munggah, ndhok trap pisanan sekiye dibantu nganggo lawang wesi.

Orak adoh teka Menara sing ana ndhok siseh tengen Masjid Al Aqsa, uga ana bangunan teka abahan bata abang yaiku lawang kembar, pager karas mesjid, lan jedhing utawa kulah kanggo banyu wudlu. Para kawula sing tau ziarah Pesarean Sunan Kudus, ogak isa orak mreguli bangunan teka abahan bata iku. Mlebu ndhok pesarean sing ana ndhok ngguri mesjid, ancen metu regol sing ana godhongan lawang teka kayu jati.


Sujarah syiar Islam ndhok Kudus, uga isa dipreguli utawa didelok teka omah para kawula, utamane ndhok kampung sak ubengane Menara. Sekiye ancen garek sithik omah adat sing diarani Omah Joglo Penchu sing dikilung pager karas tembok, ndhok kampung sing odhak adoh teka Menara. Omah Joglo Penchu sing digae teka abahan kayu jati, dadi salah sijine seksi lestarine adat istiadat lan kabudayan Islam.

Menungsa sing urip ndhok omah adat iku, nyekel kenceng keluhurane Islam. Contone, anake wedok sing wis ngancik umur prawan, orak entuk sembarangan lakune. Ngantek-ngantek ditumrapna adat pingitan. Uga ndhok njerone omah-omah iku orak tau gang ngaji Alquran. Odhak muk perkara ngati-ati tuk-e nglakokna agama, namik wong-wong iku uga dha nggae penggean dhewe. Sing wedok mbordhir kain kanggo sandhangan, sing lanang dha nyekel penggean tenuk lurik, bathik, lan nggae udut kretek.

Bukak Luwur

Meh sabendina Pesarean Sunan Kudus Raden Djakfar Sodiq ndhok Kudus Kulon, diparani ewonan kawula teka sak-ubengane Negara Nuswantara. Iku odhak beda Pesarean Sunan Muria Raden Umar Said sing ana ndhok Desa Colo, Kecamatan Dawe (Gunung Muria), Kudus. Isa dimestekna Pesarean Sunan Kudus, uga pesarean Wali Sanga liyane, muk mraming saknjerone wulan pasa Ramadan.

Sabendina puluhan bus para penziarah lunga teka ndhok Kudus Kulon, hurung montor rodha papat sing luweh cilik. "Apa neh nek saknjerone wulan Ruwah utawa Rejeb lan Syura utawa tahun anyar



KERAJINAN OMAH ADAT

Omah Joglo Penchu sing diakoni dadi omah adat Kudus ngantek sekiye ijeh isa dipreguli ndhok Kudus Kulon lan kampung liyane, mbaka wis mberah sing didol lan dibedhol teka panggonane. Tukang kayu lagek ngukir gebyok omah adat sing bahane teka kayu jati. Omah adat gaenan anyar dadi penggean sing isa nguripi.

foto KITLV Library Digital



MENARA 1880

Menara rikala tahun 1880.

Awake Menara ngantek sekiye ijeh ajek ngono iku, namik merga umur wis ping pirang-pirang didandani karo para wicaksana purbakala.

Hijriyah, isa ngantek atusan bus gedhe sing ngeterna para kawula ziarah," hare salah sijine punggawa YM3SK, Deny Dayak.

Luweh isa dimesthekna neh, ucape Deny, angger tiba 10 Muharram. Atusan ewu umat teka sak-ubengane Negara Nuswantara tumpek blek ndhok Menara. "Ya ziarah, namik uga ngenteni Bukak Luwur. Para kawula nduwe keyakinan, nek isa entuk sega nuk sing diolah nganggo bumbu aran jangkrik, bakale entuk rahmat sing gedhe," Deny nutukna.

Atusan ewon wong orak kabotan dha nginep lan melek sewengi, ngenteni esuk bar subuh diwiwiti dundhum sega nuk sing dibuntel nganggo godhong jati. Mula angger wayah Bukak Luwur (nyopot kain lawan lan ngganti kain anyar kanggo ngadhang-ngadhang kubur Sunan Kudus), Menara lan sak-ubengane Kudus Kulon ketok reja. Beda karo nek njamas pusaka wayah Assyura, muk wong sithik sing teka nyekseni. Pusakane Sunan Kudus sing dijamak pendhak setahun sepisan antarane Keris Ciptaka lan Tombak Trisula.

Harene pegawai ndhok Dinas Kebudayaan dan Pariwisata (Disbudpar) Kudus, Muhammad Aflah, babakan nyekel piknik ziarah ndhok Sunan Kudus (uga Sunan Muria) ancen dilakokna dhewe karo warga masyarakat. "Disbudpar muk ngewang-ngewangi," Aflah nandhesna. Sing ditata Pemkab, hare Aflah, kaya dene Terminal Wisata Bakalan Krapyak, montor ojek wisata, lan becak ojek wisata. ☺

Prayitno

Alquran Deterjemahna Nganggo Basa Banyumasan




Dening
Tri Wahyuni

Siki Basa Banyumasan selot deakoni anane. Buktine siki Kementerian Agama wis mbabarna Alquran nganggo Basa Banyumasan. Alquran terjemahan kiye wis *di-launching* daning Mentri Agama, Lukman Hakim Saifuddin ana kantore tanggal 3 Desember 2015.

PAK Mentri ngomong yen terjemahan Alquran nganggo basa dhaerah nduwe anggone sing akeh. Salah sijine yakuwe mewehi panerangan tumrap sakabehane uwong Banyumas sing ora ngreteni Basa Indonesia. Anane Alqur'an terjemahan Basa Banyumas kiye genah dadi wujud ciri wancine masrakat neng tlatah Banyumas bisa nyengkuyung majune kawruh sing umum. Masrakat sing ora bisa basa Arab karo Basa Indonesia bisa ngamalna apa sing dadi isine Alquran kuwe.

Pancen genah basa Jawa Banyumasan kuwe kudu deupakara lan dekembangna. Kabeh kuwe

minangka dadi upaya nglestarekna warisan budaya sing pancen utama temenan. Angger ora deupakara lan deurip-urip basa Panginyongan ora wurung bakal ilang kayadene basa-basa liya sing siki wis sirna lan ora keprungu maning. Ewasemana basa Banyumasan dadi sakrumpun karo basa Jawa, ning basa Banyumasan kiye nduwe ciri dhewek. Uwong asring nyebut basa Banyumasan kuwe basa ngapak. Jarene *ora ngapak ora kepenak*. Alquran terjemahan basa Banyumasan kiye bisa dedadekna piranti dakwah tumrap uwong akeh gampang deayahi.



**Menteri Agama
Lukman Hakim Saifuddin**

Basa Jawa Kuna

Ahmad Tohari sing dadi salah sijine tim panerjemah Puslitbang, Kemenag ngomong yen Basa Banyumas depilih kanggo nglestarekna basa sing asale sekang basa Jawa Kuna. Miturut dheweke, basa Banyumasan kiye pancen temenanana basa asline uwong Jawa sedurunge kaworan budhayane Krajaan Mataram. Budhayawan sing manggon ing tlatah Jatilawang, Banyumas kiye ngomongna yen basa Banyumasan wis ana wiwit abad-7. Banjur, ing abad-16 *depolitisasi* daning panguwasa Krajaan Mataram sing ndadekna basa Jawa kuwe nduweni undha-usuk. Basa Banyumasan deanggep dadi basane wong pinggiran nganti ana unen-unen



LembarSASTRA

Majalah Basa Jawa Swaratama

WACAN BOCAH

Buku Dongeng

*Lembaran iki
macak seratan
Cerita Cekak, Geguritan,
Komik, Cerita Anak lan
sapanunggalane. Naskah
bisa dikirim ing alamat
e-mail:
majalah.swaratama@g
mail.com.
-Red*



Karya seni rupa
instalasi kreasine
Gunawan Effendy
dan Konde ing
pelataran Taman
Budaya Raden Saleh
Semarang.

foto: Swaratama

CERKAK

**ASUNE
MABUR
MENYANG
WUWUNGAN**



KAWRUH SASTRA
**Wigatine Wacan
Bocah tumrap
Lumakuning
Kabudayan Jawa**

Sumanto

Randhane Rakrasana

Aku sejatine putra ratu
nata gung biathara ing Mandura
rama Prabu Basudewa
mesthine aku diuja raja brana
apa-apa mung kari aba
sandhang pangan ora kapiran

nanging kasunyatane
wiwit cilik mula
aku urip ing desa
diopeni dening Bapa Antyagopa
digemateni dening Bibi Sagopi
ing Widarakandhang aku oleh piwulang

aku ora diwulang perang
nanging diparingi pitutur budi luhur
diparingi weruh unggah-ungguh
diparingi warah supaya lembah manah

saiki aku wis dewasa
aku duwe jiwa sentosa
nalika aku kudu gumanti nata
nglungguhi keprabon Mandura
aku wis sumadya
linambaran jiwa sentosa

Ambarawa, Agustus 2016



Kresna Ngudarasa

Atiku durung lega
rumangsa durung cetha
mungguh karepe dewa
jeneng adil sing kaya apa?

aku kurang apa
ing dwaraka aku dadi raja
nata praja lan ngayomi kawula
nggayuh tentrem raharja

ing perang baratayuda
aku nglabuhi pandhawa
maju ing rananggana
temah unggul ing yuda

jebul wusanane kaya ngene
lelabuhanku ora digape
patiku jalaran sepele
kaki mburu luput pangenere
aku sing kena panahe

beda karo duryudana
kuncara dadi nata binathara
bisa keceh bandha donya
apa sing ginantha dadi nyata

sanajan ana sing ngarani angkara murka
adigang adigung adiguna
nyatane lestari dadi raja
sinuyudan para kawula

patine uga sinatriya
maju ing rananggana
nganti tekan pralaya

sang hyang wenang elik-elik
ora kabeh tumindakmu becik
ing perang baratayuda kowe julig

Ambarawa, Agustus 2016

Bio Sumanto

Panggurit kang asmane Sumanto, S. Pd. iki lenggah ing
Perum Sudirman No 19, RT 04/RW 02 Kupang Duku,
Ambarawa, Kabupaten Semarang. Sedina-dinane
ngasta guru basa Jawa ing SMP Negeri 2 Grabag
Kabupaten Magelang.

Wahyu Nugroho


Liputan Investigatif

Ngayahi tugas jurnalistik, nlusur kasus lungit
prasaat ngambah alam ghaib. Dilabuhi
nungsang-njempalik jebul kesasar ing tlatah wingit;
kahanan peteng lelimengan tanpa kumrelipe lintang
ora dadi pepalang

Ngayahi tugas jurnalistik, madik sisik-melik
kasus rajapati ninggal misteri; kasus pungli
diuntal bumi; kasus kriminal ambblas tanpa tilas
kasus ngrusak pager ayu kaya prau kerem banyu
juru warta pencolotan diburu wektu

Ngayahi tugas jurnalistik
ngelak lan luwe kudu diampet
kencenge karep nyuwak lelakon buket

Wonogiri, 2016



Bio Wahyu

Lair ing Wonogiri tanggal 1 Mei 1972.
Alumni Prodi Basa Jawa Fak. Ilmu Budaya
UNS Solo, saiki mulang ing SMP Negeri 1
Giritontro, Kab. Wonogiri.



Editorial Kencar-Kencar

Editorial rinakit basa prasaja
lantip, jujur, lan cetha
njilma cahya tumrap kang kepetengan
dadi teken tumrap kang kelunyon
memba payung tumrap kang kodanan

Editorial kang njilma cahya
gumebyar kencar-kencar nitis saka kadiwasan
wawasan jembar jiwa menep
ngawal dhemokrasi lan jejege keadilan
tumuju kawicaksanan

Editorial kang njilma cahya
muncul saka ublik jroning dhadha
kudu tansah dijaga aja nganti musna
nalika srengenge ngalami grahana
lan rembulan dicaplok Bethara Kala

Wonogiri, Oktober 2016

ASUNE MABUR MENYANG WUWUNGAN

"Maaf Kang, kowe ora balik ndesa?"

Mbakyu nakokake terus.

Ketoke wis limang sasi awakmu ora mulih ya?

Gery, anakmu ya wis gedhe... wis ajar mlaku.

Ora kangen Kang?"

Dening: Budi Wahyono


SMS sing jumedhor wayah esuk ukara tabuh jam lima mau gawe atine Sarman tratapan. Batine ngira-ngira, kok dengaren Mardi ngirim pitakon sing sajak ngemu karep aneh. Ora wurung Sarman banjur ngulu idu. Mripate diucek-ucek mbok menawa ukara sms malih. Nanging atine tetep nggronjal. Mripate nyawang kancane buruh bangunan sing isih pating gluntung mancali pucuk sarung sajak durung tutug anggone turu. Sarman kelingan, mau bengi lagi padha turu sawise dolanan kertu tekan jam rolasan.

"Aku kudu mulih?" pitakon mau bali nglurug tekan njero atine. Ing dhompet pancen ana dhuwit kejepit gunggung sayuta. Kuwi wae olehe lumpuk-lumpuk watara limang sasinan.

Kudune, yen sedina bisa nyisihake patang puluh ewu, limang sasi lak ya bisa nyimpen limang yutan.

Nanging kenyataane meh kabeh dhuwite kaya-kaya amblas, kesedhot samubarang karep sing ora nggenah.

Sarman nate nyoba ngombe oplosan, main kertu, tumeka kecanthol nyoba mlebu gubug karaokenan



barang. Paling ora karaoke kelas ndhek-ndhekan sing panggane temangsang ana tanggul pinggir kali. Etung-etung kanggo panglipur ati nalika sepi. Ora nelangsa terus.

"Wani bali nggawa dhuwit sayuta?" pitakon sing landhep kaya njugil atine Sarman. Ati sing liya nggenepi, kelingan anake sing kudu dirangkul, diuyek-uyek, digendhong.

"Aku tukokke susu Pak," ora let suwe kaya ana swara aneh mlebu ngomah. Metu lawang tengah. Tanggung jawabe minangka wong lanang krasa diagaki pedhang.

"Ya,, aku sesuk mulih Le, mulih. Sanadyan mung nggawa dhuwit sithik. Ya kaya ngene iki Le, gaweane bapakmu, srabutan. Sing penting bisa mangan. Apuranen ya Le, yen bapakmu nasibe kaya ngene. Iki nasibe bangsa sing bodho kaya bapakmu sing sekolahe mung tekan SMP. Lha sarjana wae akeh sing nganggur Le, apa maneh bapakmu... Sabar ya Le?" atine nggrantes nandhes. Rambute sing rada kriting lan ora nate kambon sampo mau blas ora digatekake. Mripate nyawang adoh. Mbayangke antri ana terminal Rambutan, melu bis wayah surup, mrambat mlaku metu Cirebon, Tegal, Semarang, lagi tekan Mranggen dina esuke.

Ora kaya wayah bada, golek bis ndilalah gampang. Bis rada kebak. Jam sanga meh kabeh penumpang padha turu. Pikirane Sarman ruwet mbundhet. Kesrimpet. Malah kala-kala kaya dalan pedhot kebak brongkalan. Alon-alon tuwuh naluri alane, naluri maling! Mula ing sadawane karep dheweke banjur nduweni idhe, piye carane mulih kanthi nggawa dhuwit sing gungunge rong yutan?

"Dadi begal wae Kang, dadi begal!" mak bluwek! Ana swara iblis mbisiki kupinge. "Kena kanggo tuku susu anakmu. Mosok wong lanang ora isin, mulih karo tangan tanpa oleh-oleh?"

"Begal..," klesike ati kawetu alon.

"Terus modhal utawa gamanku apa? Penthung, lading, watu?"

"Modhalmu ati sing wani! Aja ingah-ingih. Mantep! Yen perlu ngombe oplosan ben mripatmu dadi mripat setan, jlalatan, ora nduwe wedi karo sapa wae. Apa maneh karo calon korban!" panyurunge swara mau tambah nggegirisi. Gandheng Sarman tau ngrasakake gandeme oplosan, e! lha kok ujug-ujug kangen.

Mula mudhun saka terminal, nguyuh ana kiwan, ketemu wong tatonan, diwanekake olehe takon:

"Mas, sing dodol omben-omben ki

ngendi?"

"Yah mene arep mabuk?" wong lanang tatonan mung mesem.

"Tak nggo mengko bengi Mas," semaure Sarman tenanan. Ora let suwe bakul oplosan sing panggonane ndhelik kasil dipethuki. Sagendul cukup kanggo sarana mabuk. Kanthi prigel gendul isi omben-omben disimpen primpun ana tas. Rumangsa gagah, nanging Sarman ujug-ujug krasa luwe. Jangkahe menggok menyang warung. Nalika wareg mripate kudu kepengin turu. Apa maneh mau bengi kurang turu, dadi lungguh ana dhingklik kayu terminal wae mak lhes! Kesurung turu.

Surup sing medhun mlangkrik dadi wengi. Bola-bali mripate nyawang gendul isi oplosan ana njero tas. Perlu nyiapake surungan wujud gorengan. Bakwan, mendhoan utawa arem-arem. Kocapa, kepilih telu-telune. Sesuk, yen tangi esuk, dipetung pangan mau durung mambu. Kok suwe temen ya rasane ngoyak esuk. Ah. ora perlu turu, malah kesuken. Jam papat utawa setengah lima aku kudu kasil dadi



begal! Karepe kebacut mobal.

Isih ndhepiis ana emper sawijining toko wewengkon terminal, dheweke digugah karo kluruke jago. Saut-sautan.

"Ayo enggal menyang ndalan?!" swara iblis nggetak.

"Dadi begal? Sida dadi begal?" pitakone karo ati njegeges.

"Ora nggenah! Mosok ora wani?" iblis tambah ngece. Sarman ngadeg, oncat saka terminal, nunut bis njaba kutha banjur mudhun ana panggonan sepi. Lumayan, kari pitung kilometeran saka ngomah. Yen kasil, bisa langsung mulih.

"Butuh dhompete bakul apa pit montor?" pitakone iblis.

"Loro-lorone!" gumregah olehe nyauri.

"Ngombe sik, surungan aja lali! Sing kendel!" iblis awèh pituduh. Sarman mesem. Dituruti kabeh karepe iblis. Satekem mendhoan dipangan, Oplosan diuyub. Gagah kaya lakon film bandhit ing televisi. Lakune mrambat menyang petengan. Siji loro bakul lewat dalan peteng. Karepe tambah mantep. Nalika ana pit montor lewat, Sarman nyegat, nggetak sing numpak:

"Mandheg! Pilih modar apa nyerahke pit montormu?!"

Sing numpak pit montor, ora geduga njejak Sarman. Sarman bisa ngendha. Sing numpak tiba dasaran. Banjur mbengok sakayange: Begal! Begal! Begal! Ora ana wong tangi.

Sarman kalap. Kayu pring sing ora adoh saka kalenan didudut lan disabetake korban. Bruk! Pas helm cakile. Korban dasaran maneh. Kunci pit montor dirampas Sarman. Setang

Pit montor dicekel Sarman, ditumpaki. Digas sakpole mbuh tumuju ngendi...

Karepe Sarman esuk kuwi arep adol pit montor menyang toko sing adol montor. Mengko mesthi bakal ana calo kemruyuk rebutan ngenyang. Nanging mbuh merga apa ujung-ujung Sarman kelingan Gery lan sisihane. Mendah senenge yen aku mulih kanthi nggawa pit montor. Saben sore bisa mubeng-mubeng kampung. Ngeneng-eneng cilikan.

Kocapa pit montor mlandhang nembus lurung aspal adohe pitung kilo meteran. Sarman durung lali karo omahe. Tumeka prapatan cedhak swalayan, maju limang atusan meter tekan regol. Menggok tengen tumuju omah sing paling pojok mepet sawah.

Swara montor sing mruput esuk ndadekake simboke marani.

"Man? Kowe numpak apa? Ojek? Kene-kene mlebu..,"

"Ya Mbok, tak adus sik ben seger," semauke mantep. Mboke nari Sarman arep ngombe apa. Teh apa kopi karemane.

"Kopi ireng wae Mbok,"

Wong wadon seket lima tahunan mau tumuju gandhok. Mbukak termos lan klithik-klithik ngudhak gawe kopi. Untung bapakne isih nduwe simpenan kopi.

Bubar andhukan Sarman takon:

"Mbok, lha bapak endi?" mak dheg, atine gowang.

"Lagi metu, sedhela maneh teka, paling mubeng-mubeng ndalan ... mumpung sepi. Ajar pit montor,"

"Pit montore sapa Mbok?" ndredel olehan takon.

"...Tuku. Kasile panen, ben cemanthol. Aku ora ngira yen bapakmu kok ya kedanan pit montor barang," semauke karo nawani wedang kopi.

Atine Sarman tambah tratapan. Menthelegi simboke. Tuwa tenan raine. Lha bapak?

"Bapak numpak pit montor apa Mbok?" pitakone maneh.

"Ireng campur ijo, ana apa Le?" swarane malih semu geter. Sarman ngulu idu.

"Akeh begal lho Mbok, ngati-ati. Aku lagi wae nyekel begal. Pit montore tak gawa mulih..," kandhane ngundang pikiran.

"Lha kok aneh, endi pit montore?" karo nyincing jarik simbokne ora sabar. Sarman ngajak mbokne marani pit montor. Teku kiwan omah..

"Lho, kuwi lak pit montore Bapakmu Le? Piye ta Le?"

"Mbok? Tenan Mbok? Dadi bapak sing kebegal Mbok?" swarane Sarman kaya wong adus glagepan. Ora let suwe ana swara gembrudug pit montor karo asu njegog. Wong-wong kampung padha metu. Sarman bingung olehe ndhelik. Gery, anake sing isih angler turu melu tangi, nangis gero-gero. Polisi gunggung papat nuruti playune

asu. Gandheng ana andha semendhe wit mlinjo, Sarman banjur njunjung lan masang tumuju gendheng. Sarman munggah menyang gendheng. Mbrambat tumuju wuwung. Matane bruwet.

Ora kinira, asu sing pinter nglacak maling ngambus lemah, mubengi omah, ndagak, nyawang wuwung lan whut!!! Kaya-kaya asu mau mabur menyang wuwungan. Nyokot kathoke Sarman. Sarman jerit-jerit. Ing sangarepe wong sing pating kemruyuk kababar pawarta ngagetake. Lik Kirdi, bapak Sarman, dadi korban begal. Saiki isih diopeni ana sawijining rumah sakit. ... ©

Semarang, 2016

"Dadi begal wae Kang, dadi begal!" mak bluwek! Ana swara iblis mbisiki kupinge. "Kena kanggo tuku susu anakmu. Mosok wong lanang ora isin, mulih karo tangan tanpa oleh-oleh?"



Budi Wahyono, lair ing Wonogiri Jawa Tengah, 17 Juli 1959. Lulusan Magister Ilmu Sosial Politik Fisip Undip iki mulang ana SMK Negeri 7 (STM Pembangunan) Semarang. Seratane awujud cerkak lan geguritan sumebar ana *Parikesit*, *Jaya Baya*, *Djaka Lodang*, *Panyebar Semangat*, *Solopos*, *Mekarsari*, *Kedaulatan Rakyat*, *Pustaka Candra*, *Derap*, lan melu katut ana antologi.

Kumpulan Parikan (Pantun) Basa Jawa



Pasar Kramat, Pulau Bawean, malem jumat, turune dhewekan.
Soto babat bumbune trasi, dadi pejabat aja korupsi!
Tape ketan neng njero cangkir, wis dadi mantan rasah dipikir!
Gendhing kanggo tembangan, gak isa nyanding amarga kahanan.
Kacang kara di gondhol kucing, aku meh mara lawang aja dikancing.

Esuk ngikir sore ngikir, kikire arek Surabaya.
Esuk mikir sore mikir, sing di pikir ora rumangsa.

Klambi biru ning ndhuwur klasa, yen Bapak Ibu ora setuju, aku isa apa?
Tuku gitar ning Pasar Silir, kuwi pacar apa piala bergilir?
Numpak sepur saka Purwosari, ngomong rindu tak terukur, tapi ra ndang ditemoni.
Manuk emprit nucuk pari, adi murid sing taberi.
Jemek jemek gulane Jawa, aja ngenyek padha kanca.
Manuk tuhu mencok pager, yen sinau dadi pinter.
Wedang bubuk tanpa gula. Aja sok ngantuk, gelis tuwa.
Wajik klethik gula Jawa. Luweh becik sing prasaja.
Wedang bubuk gula tebu. Mata ngantuk njaluk turu.
Kembang mlathi warna peni ngganda wangi, watak putri kudu titi ngati ati.
Gudeg manggar bumbune mrica ketumbar, lamun sabar bisa lebar sarta bingar.
Kembang kencur tinandur ing pinggir sumur, yen wis makmur aja lali marang sedulur



Sumber: Pepak Lan Wasis Basa Jawa

Buku Dongeng

Dening

Al Aris Purnomo

Agung nembe maca buku dongeng nalika telpun ing ruwang tengah muni. Agung mlayu banjur ngangkat telpun. Pranyata sing telpun Budhe Larti, awèh kabar kalamun kampungé Lik Warsidi nembe wae ketrajang banjir. Agung enggal ngaturke kabar mau marang bapak lan ibune.

BUDHE Larti crita yen omahe Lik Warsidi uga katut ketrajang banjir. Pak Nanto enggal tumandang kanthi nggawa ubarampe sing dibutuhke lan mangkat menyang kampungé Lik Warsidi. Kabèh kulawargane Pak Nanto melu, kalebu Agung. Budhe Larti uga wis mangkat saka dalem kang ana ing kutha liya.


Kampungé Lik Warsidi kuwi adoh banget. Listrik saka pamarentah durung mlebu kampung kuwi, anane mung listrik swadaya sing migunakake kekuwatan banyu kali ing cedhak kampung kang ngubengke turbin satemah ngasilke listrik. Listrik ing kampung kuwi mung murub wanci bengi. Amarga bencana alam banjir kuwi, kali dadi mbludag, turbin rusak awit ketrajang banyu sing tekane luwih gedhe.

Agung rumangsa trenyuh nyawang sedulure kang jenenge Anis. Omahe ambruk, ketrajang banjir, wong tuwane sakloron nandhang tatu abot lan kudu digawa menyang rumah sakit ing kutha.

Agung amung bisa menehi buku dongeng sing isine crita-crita saka saindenging Nusantara.

Sabanjure, Pak Nanto lan Budhe Larti bebarengan warga kampung ngurusi omahe Lik Warsidi amrih bisa ngadeg manèh. Dene Anis digawa menyang kutha nunggoni bapak lan ibune ing rumah sakit.

Ing rumah sakit, Anis rumangsa



entuk kanca kang mirunggan yakuwi buku dongeng. Saliyane kuwi prasasat saben dina kulawargane Pak Nanto ngindhaki Lik Warsidi lan bojone.

"Kepiye kahananmu dina iki, Anis?" pitakone Agung.

"Kahananku apik, Mas.

Bapak ibu semono uga, sesuk wis entuk bali mulih menyang dhusun," Anis wangsulan kanthi kebak kabagyan. Buku dongeng tansah digawa menyang ngendi-endi.


Dina teruse, kulawargane Anis wis entuk bali menyang omahe. Kahanan kesarasane wis pulih. Tekan kampung dipethuk tangga teparo kanthi seneng. Sanadyan prasasat kabeh ngrasakke kapitunan awit anane banjir, nanging amarga raket ing paseduluran, kabeh rasa pituna bisa suda. Kabeh entuk tamba wujud kawigaten saka sedulur-sedulur kang peduli marang panandhange warga kampung kuwi.

Ganti dina ganti tahun, tan kanyana ana prahara utawa udan lan angin sing gedhe nrajang desa sing cedhak karo kampunge Anis. Desa kuwi bosah-baseh, luwih parah tinimbang desane Anis nalika ketrajang banjir. Akeh warga desa kang kelangan omah. Akeh warga kang nandhang tatu.

Anis duwe kanca raket ing desa kuwi, jenenge Sekar. Sekar kuwi kanca nunggal sekolahan lan nunggal kelas karo Anis, malah lungguhe sameja. Omahe Sekar uga ambruk, wong tuwane uga nandhang tatu, padha karo kahanane Anis biyen.

Bocah wadon cilik aran Anis kuwi trenyuh meruhi kahanane Sekar. Anis banjur menehke buku dongeng marang Sekar.

"Muga-muga buku dongeng iki bisa piguna kanggo kowe, kena kanggo kanca," tembungé Anis tulus.



"Muga-muga buku dongeng iki bisa piguna kanggo kowe, kena kanggo kanca," tembungé Anis tulus.

"Matur nuwun, Anis. Kowe pancen kanca sejatiku," Sekar nampani buku dongeng kanthi mesem.

"Matur nuwun, Anis. Kowe pancen kanca sejatiku," Sekar nampani buku dongeng kanthi mesem.

Sawetara wektu sabanjure, Agung lan Pak Nanto ngindhangi kahanane Lik Warsidi lan kulawargane. Pak Nanto rumangsa lega dene kahanane Lik Warsidi wis

luwih becik. Pak Nanto ngucap syukur marang Gusti.

Agung semono uga, dheweke rumangsa seneng, weruh Anis wis bali kaya padatan, dadi bocah sing lincah lan tansah katon bungah.

"Nis..., buku dongeng isih kosimpen, ta?" pitakone Agung.

Anis meneng wae, dumadakan praupane owah, nuduhke rasa kuwatir.

"Ana apa?" pitakone Agung maneh.

Kanthi lirih-lirih amarga kuwatir Agung kuciwa, Anis nyritakke kalamun buku dongeng diwenehke Sekar kang dina-dina kepungkur nembe ketaman bebendu. Anis njaluk pangapura marang Agung.

Agung dhewe ora nesu, malah rumangsa seneng marang tumindake Anis kuwi.

"Aja kuwatir, aku ora nesu. Aku malah seneng yen buku dongeng kuwi bisa piguna kanggo kancamu. Karepku rak ya kaya mangkono, biyen nalika aku menehke buku kuwi pamrihku kowe bisa entuk kanca lan panglipur. Iki dakgawakke buku dongeng maneh, ora mung siji. Malah ana sing tulisane nganggo basa Jawa."

Anis katon lega lan seneng banget. Buku-buku dongeng ditampa kanthi seneng.

Kabeh lumaku becik anane. Ing liya desa, Sekar wis ora sedhih maneh. Wektu teruse bisa gegojegan maneh karo Anis ing sekolahan. Uga crita bab buku dongeng kang tansah setya ngancani ing kahanan apa wae.

Pancen wong kang nembe nampa bebendu kuwi butuh pambiyantu. Ora amung wujud bandha donya, nanging uga panglipur sing ngurangi rasa sedhih. Agung menehake buku dongeng amrih bisa dadi panglipur. © (Cuthel)

Wigatine Wacan Bocah tumrap Lumakuning Kabudayan Jawa

Dening: Jefrianto, S.Pd.

Sabarang babagan diwiwiti saka apa kang winastanan dhasar/kawitan. Yen wiwitane wis apik, ing tembene besuk bisa diangkah bakale dadi apik. Upama nandur, yen wiwitan cilik digemateni lan diwenehi rabuk kang apik temtu ana angkah besuk muga dadi tetuwuhan kang migunani lan murakabi.


KAHANAN iku kaya dene kang dumadi nalika nggula wenthah bocah. Kabeh wong tuwa mesthi kepengin anake dadi wong kang migunani lan gedhe pangabektine. Dalan utama kanggo mujudake iku temtu nganggo *prinsip* kang diarani: asah-asih-asuh. *Prinsip* iku kang bebakalane luwih nyata maneh ing laku-pamomonge wong tuwa tumrap anake.

Laku-momonge saben wong tuwa umume beda-beda. Saben wong tuwa duwe cara dhewe-dhewe. Para luhur ing jaman wuri nganggo piranti carita kanggo matrapake budi pekerti luhur mring putra-putrine.

Carita dianggep minangka sarana kang *efektif* kanggo menehi patuladhan becik tumrap bocah. Carita duwe daya panimbul imajinasi kang trep karo pola pikire bocah kang isih dikebaki daya pikir (*imajinasi*). Awit saka iku, carita minangka piranti kang trep kanggo ngasah, ngasihi, lan ngasuh bocah.

Banjur carita bocah sing kepriye kang trep kanggo mulang putra? Ing toko buku temtu wis akeh nyumadhiyakake wacan bocah. Nanging, minangka wong Jawa, bokmenawa luwih prayoga yen buku kang dienggo sarana mulangake budi pekerti tumrap bocah nganggo wacan bocah abasa Jawa.


Pangangkahe migunakake wacan bocah abasa Jawa,



yaiku bocah bisa uga sinau ngenani basa Jawa. Ing jaman kang sarwa modhern, bocah luwih asring tetepungan karo basa non-Jawa. Dadi ilate wis jarang kembul karo basa Jawa. Yen kahanan iki kalirwakake, temtu mbebayani

kanggo arumbakaning budaya Jawa, mligine jati dhirine wong Jawa. Lumantaran wacan bocah abasa Jawa rasa kuwatir iku kirane bisa sinuda, lan muga kasirnakake.

Ndelengake kahanan kaya kang dingengreng iku jebule prelu pamikiran kang premati jalaran wacan bocah abasa Jawa kuwi sithik cacah. Kita amung nemoni wacan kuwi ing hudyana-hudyana abasa Jawa kang cacah paling siji saben cithake. Iku bae tinambah kasunyatan hudyana abasa Jawa kang rutin terbit ora sepira cacah. Sebut bae *Ancas*, *Djaka Lodang*, *Pagagan*, *Panjebar Semangat*, lan *Jaya Baya*. Cacah semono kuwi sithik banget kanggo sarana pendhidhikan tumrap bocah. Kita butuh wacan abasa Jawa kang luwih saka iku.



Antologi

Ngematake kahanan kaya mangkana, ana saweneh gagasan kang bokmenawa bisa kanggo ngatasine. Kang pisanan, yaiku ngumpulake carita-carita bocah saka hudyana wiwitan wuri minangka sawijining antologi. Kirane, dinas kabudayan ing tataran kabupaten lan provinsi bisa mujudake lembaga negara kang trep kanggo ngopeni babagan iki. Wewenang ngurusi babagan kabudayan ing masarakat jinekel dening lembaga iki.

Upaya iki uga mbutuhake wong kang bisa nyeleksi wacan bocah kang trep karo lumakune jaman. Kanggo iku, dinas kabudayan bisa nggadheng sastrawan Jawa kanggo iki. Rasane, ora angel golek sastrawan Jawa kang mumpuni. Saben dhaerah darbe sastrawan-sastrawan Jawa kang mitayani. Kari gelem orane kanggo nggoleki.

Upaya kasebut prayogane uga linambaran inovasi. Donyaning bocah iku donya imajinasi. Yen ta buku wacan bocah iku murni amung teks, bocah akeh ora sengseme. Mula, buku wacan bocah apike uga kudu diwenehi *ilustrasi* kang apik, bisa ing saben kaca, bisa ing saben awal carita.

Ilustrasi mono bisa kanggo narik kawigatene bocah. Upamane, bocane weruh gambar kang nggugah daya imajinasine sabanjure age-age kepengin maca caritane. Iki yen *ilustrasi* kababar ing wiwitan carita. Yen saben kaca diwenehi *ilustrasi* uga apik maneh, sabab sinambi maca carita, bocah uga bisa ngreronce imajinasine.

Sutresna donya bocah, kaya dene Kak Seto, upamane, uga bisa ginandheng kanggo proyek wacan bocah. Dadi, ing tembe wacan bocah bakale kagarap kanthi mateng. Wis suwe karya sastra Jawa modern, kaya mung digarap setengah-setengah. Langgame nalika dikritik tetep padha, yaiku atur wangsulan: "*kang wigati wis nguri-uri budaya Jawa*". Mendah apike menawa karya sastra Jawa digarap kanthi temen, luwih-luwih dening pehak kang wenang ngurus budaya.

Minangka pameling, iku kabeh mau nembe laku mula kanggo ngrembakake sastra Jawa lumantar wacan bocah. Laku sebanjure kang bisa ditindakake bokmenawa nyisipake ajaran moral saka luhur. Temtu ajaran moral iku kudu diracik kanthi prasaja, nora kaya buku-buku filsafat Jawa. Dadi ajaran luhur ing tembe uga melu dingrembakakake.

Ngrembakake sastra Jawa lumantar wacan bocah bisa dadi dalan anyar kanggo kumandhanging budaya Jawa. Kasadharan tresna budaya Jawa ora mung dinarbe dening para dhiwasa utawa mung winengku dening sutresna budaya Jawa. Ananging, menawa kasadharan iku tinandur kawitan cilik, impen-impen bab kumandhanging sastra Jawa bebakalan nemahi kasunyatan.

Pancen nora ana laku kang tanpa resiko. Laku kasebut sanadyan becik lan murakabi ing ancane, nanging ing palaksananaane duwe *risiko* kang gedhe. Resiko kuwi kerep andadekake wong cilik ati dhisik tumrap kawujude

buku wacan bocah abasa Jawa. Ananging, welinge para luhur, *jer basuki mawa beya*. Kabeh babagan butuh prejuwangan, butuh lelabuhan. Kanthi *sistem* untung-rugi, rasane pangangkah ngrembakaning ajaran luhur Jawa angel linaksanan. Sayektine, kita kudu wani asung labuhan.

Bokmenawa bener ature jangka: samengkone wong Jawa bakale kari "separo". Bener, wonge lair, nglakoni urip ing tanah Jawa. nanging ciri khas budaya Jawane wis ora katon. Yen dilirwakake ngono bae, nora mokal generasi penerus budaya Jawa bakale sirna. Jawa bisa mung kari carita lan nama.

Kahanan iki kang banget mbabayani tumrap anane budaya lan wong Jawa. Mula, wiwitan iki kita wong Jawa, utamane tumrapa pehak kang wenang ngopeni budaya Jawa bisa miwiti nggali. Sepira abote tuna dana tinimbang ing tembe mburine nemahi *tuna jati dhiri?* ©



Jefrianto, S.Pd.

**Guru Basa Jawa*

SMK Kesatrian Purwokerto

Esais Sastra Jawa

Pangangkahe migunakake wacan bocah abasa Jawa, yaiku bocah bisa uga sinau ngenani basa Jawa. Ing jaman kang sarwa modhern, bocah luwih asring tetepungan karo basa non-Jawa.

Tekad Nglestarekake Basa lan Aksara Jawa

Dening Ikke Kusumawati, S.Pd.

Aksara Jawa iku salah sijining wujud budaya Jawa minangka peranan saka budaya Indonesia. Ora akeh bangsa ing donya iki kang duwe aksara dhewe, tuladhane aksara Latin, Hieroglyph, Arab, Cina, Jepang, lan India, kalebu aksara Jawa.

GUNGGUNGING aksara iki ora akeh kaya gunggunging basa lan bangsa ing donya. Aksara ana kang lestari digunakake kayata aksara Arab, Cina, Jepang, Korea, apa maneh aksara Latin kang dianggep bisa digunakake kanthi praktis. Ananging, ana aksara kang wis arang digunakake malah kepara ameh punthes. Aksara Jawa kalebu aksara kang kasingkir ing lingkungan sekolah, uga ing masarakat. Bab ing mesthi bae ndadekake rasa prihatin kanggo saperangan wong kang tansah kapengin nglestarekake lan ngrembakakake supaya basa lan budaya Jawa bisa tetep lestari.

Nglestarekake Aksara Jawa

Saben bangsa mesthi bae kapengin nglestarekake budayane dhewe-dhewe kalebu basa lan aksarane. Pambudidaya kanggo nglestarekake aksara Jawa ana maneka warna.

Kayata gawe paugeran kanggo pathokan nulis basa Jawa migunakake aksara Jawa. Para gubernur ing Jawa taun 1996 uga sarujuk bebarengan ngrembug babagan *pembinaan, pengembangan dan pelestarian bahasa dan aksara Jawa*. Ora mung tekan kono, ing taun 2012, Pemerintah Provinsi Jawa Tengah uga ngetokake Perda Provinsi Jawa Tengah Nomor 4 Tahun 2012 babagan *Penyelenggaraan Pendidikan*

Lan Perda Nomor 9 Tahun 2012 babagan Basa, Sastra, lan Aksara Jawa

Ing Perda Provinsi Jawa Tengah Nomor 4 Tahun 2012 babagan

Penyelenggaraan Pendidikan ing antarane diandharake manawa basa Jawa kudu diwulangake ing tataran SD, SMP, dan SMA paling sithik 2 (rong) jam saben minggu supaya siswa duwe rasa handarbeni basa lan budaya Jawa. Kanthi pangajab siswa bisa ngrembakakake basa lan budaya Jawa minangka sarana kanggo mbangun budaya nasional Indonesia. Tanpa budaya saka dhaerah-dhaerah, budaya nasional Indonesia ora bisa madeg. Budaya Indonesia dumadi saka maneka warna budaya dhaerah kang ana ing Indonesia jumbuh karo Bhinneka Tunggal Ika.

Pasal 6 Perda Provinsi Jawa Tengah Nomor 9 Tahun 2012 babagan Basa, Sastra, lan Aksara Jawa uga tinulis:

"Dalam kegiatan perlindungan, pembinaan, dan pengembangan bahasa, sastra, dan aksara Jawa perlu ditetapkan pedoman penulisan Aksara Jawa dengan Wewaton Sriwedari sebagai panduan, serta dilakukan pembelajaran kembali carakan Jawa dimulai dari Aksara Jawa Dentawyanjana, sandhangan, pasangan, dan angka."

Piwulang Basa Jawa

Piwulang basa Jawa kaya dene piwulang basa liyane nggladhi patang ketrampilan basa. Ketrampilan basa mau yaiku ngrungokake, wicara, maca, lan nulis. Ketrampilan maca lan nulis minangka peranan ketrampilan kang kudu digladhi siswa. Mligi kanggo piwulang basa Jawa, ketrampilan maca lan nulis kalebu ketrampilan maca lan nulis aksara Jawa kang dadi peranganing *kompetensi* kanggo siswa. *Kompetensi* iki duwe ancas siswa bisa maca lan nulis aksara Jawa saka tataran SD/MI tumeka tataran SMA/SMK/MA. Bab kang gawe prihatin lan sedhih uga bisa dadi pitakon kang gedhe yaiku piwulang basa Jawa migunakake aksara Latin, kamangka basa Jawa duwe aksara dhewe. Saliyane iku, ana panganggep menawa aksara Jawa ora penting. Mula, akeh kang ora bisa maca uga nulis aksara Jawa kanthi lancar amarga ora kulina.

Piwulang basa Jawa iku prayogane ya migunakake aksara Jawa, ora banjur migunakake aksara Latin. Asring uga ditemokake alih aksara basa Jawa kang kuwalik. Kudune saka aksara Jawa dialih aksara dadi aksara Latin nanging malah kuwalik saka aksara Latin lagi ditulis migunakake aksara Jawa. Kamangka saperangan ana kang nulis basa Jawa migunakake aksara Latin kang kurang trep. Bab iki ndadekake salah anggone nulis.



Tuladhane yaiku tembung *lara* 'sakit' saperangan manawa nulis migunakake aksara Latin yaiku *loro*. Anggone nulis ing aksara Latin iki salah banjur dialih aksara migunakake aksara Jawa ora nganggo taling tarung dadi kawaca *lara* kamangka tembung *lara* beda banget tegese karo tembung *loro*. Nulis tembung basa Jawa migunakake aksara Jawa cetha banget bedane. Tembung *lara* migunakake aksara legena kabeh, dene tembung *loro* migunakake sandhangan awujud taling tarung.

Aksara Jawa mung didadekake perangan saka pasinaon basa Jawa. Aksara Jawa ora digunakake minangka aksara kanggo sarana nulis basa Jawa kaya basa manca liya kang duwe aksara dhewe. Bisa digatekake lan dideleng kanthi cetha basa liya kang duwe aksara migunakake aksarane dhewe

kanggo pasinaon. Tuladhane sinau basa Sansekerta langsung migunakake aksara Devanagari, sinau basa Arab migunakake aksara Arab, sinau basa Jepang migunakake aksara Jepang, lan sinau basa Korea migunakake aksara Korea. Bab kang ndadekake luwih nglarani ati maneh yaiku ing saperangan tataran SD mligine ing Jawa Tengah wiwit saka kelas 1 SD entuk piwulang basa Mandarin utawa basa Arab langsung migunakake aksara Mandarin lan aksara Arab, dene nalika sinau basa Jawa tetep migunakake aksara Latin lan aksara Jawa lagi diwulangake ing kelas kang luwih dhuwur. Mula rasane nggrantes lan ndadekake lara ati nalika aksara Jawa wis ora diajeni.

Ironis banget, *Wong Jawa Ilang Jawane*. Wong kang urip ing tanah Jawa lan wong kang duwe getih keturunan Jawa wus ora tepung maneh karo aksarane dhewe. Aksara kang minangka tinggalane leluhur kang nuduhake wujud unggul cipta, rasa lan karsaning wong Jawa.

Ana unen-unen *bisa amarga kulina*. Kanthi ngulinakake nganggo aksara Jawa bisa mujudake aksara Jawa tetep lestari. Kang dadi pangarep-arep, wong Jawa lan wong kang urip ing tanah Jawa bisa maca lan nulis migunakake aksara Jawa.

Dadi, kudu enggal dikulinakake maca lan nulis migunakake aksara Jawa diwiwiti saka pawiyatan. Kanthi ngulinakake migunakake aksara Jawa mligine ing piwulangan bakal dadi pakulinan ing tlatah Jawa. Migunakake aksara Jawa ing pawiyatan mligine ing piwulang basa Jawa bisa ndadekake akeh wong bisa maca lan nulis aksara Jawa. Aksara Jawa bakal digunakake wong akeh lan ing pungkasan aksara Jawa dikenal wong akeh uga duwe pangaji kang dhuwur ing donya. Aksara Jawa bisa *"go internasional"*

Yen dudu awake dhewe sapa maneh kang ngajeni murih lestari, Yen ora saiki kapan maneh bakal nglakoni!

Basa Tegalan

Dudu “Ngapak-Ngapak”

Eling Tegal mesthiné èling moci. Maksudé nyruput médang poci.
Nglancong maring Tegal yèn durung nginung teh poci durung marem.
Njuran, apa sih sing nggawe tlatah Tegal kuwé dadi menarik?


PANGANANÉ? kuwé ora salah. Ning kotané enyong ana panganan sing diarani kupat glabed sekang Randugunting, kupat bongkok sekang Desa Bongkok, Kecamatan Kramat. Ana tahu aci sekang Benjaran, martabak sekang Lebaksu, kacang asin bogarès sekang Desa Bogarès, Kabupaten Tegal. Ana maning panganan sing ora kalah moncèr, sauto sekang Kecamatan Talang. Yèn diitung akèhé por. Pèndhèké yèn ngomong panganan lumayan asik. Mung, nang kéné enyong ora pan crita bab panganan. Toli pimèn?

Nang kesempatan kiyé enyong pan crita bab basa. Daning ngapa diarani basa tegalan? Tegalan ning kéné kiyé dudu 'kebon' utawa sajinisé, tapiné tembung *tegal* sing olih panambang *an* kayadéné *Semarangan*, *Cerbonan*, *Banyumasan*, lan sapanunggalané.

Ngomong tegalan apa ora malah ngisin-isini? Jaré pérangané uwong, basa tegalan kuwé kasar, cruwek alis saru tur wagu. Paling banter kur kanggo gojègan alias guyonan thok. Adhuh! kayong nelangsa nemen dadi wong Tegal? Kayong ngina saporèté adhong

sampeyan duwé omongan kaya kuwé. Apa sampeyan ora ngerti? Apa sampeyan ewis wegah gogoh budaya? Cacak gèn, sampeyan teka maring kotané enyong. Nyoba dhisit nguber seniman-seniman asli Tegal. Apa iya basa tegalan bisané kur kanggo bahan lawakan, kasar, laka unggah-ungguhé klawan laka *estetikané*?

Kanggo njelasna kiye, enyong blèh nganggo teori-teori sekolahan



Sing njlimet. Enyong dudu uwong sekolahan, tapiné, ewis akeh nemen mahasiswa padha nekani enyong njaluk *referensi* bab basa tegalan kanggo saraté bisa lulus sarjana utawané para calon doktor sing keranta-ranta nggolèti enyong. Ancasé ora liya pan gawé tesis kanggo ngranggèh gelar doktoré. Sing ning luar negri ya padha teka maring enyong ora kurang golèt buku antologi puisi tegalan sing intiné pan kanggo *referensi* penlitiané.

Sesrawungan

Yèn wis kaya kuwé kasunyatané, mesih baé basa tegalan dianggep kumpungan? cacak dipikir mèn aja *gagal paham*. Mituruté enyong kabèh basa laka sing ècèk-ècèk uga adhiluhung. Kabèh basa endi baé duwé titik lemah uga keunggulan. Tegasé, padha mulyané padha dedegé.

Basa kanggo sarana sesrawungan duwé drajat sing padha. Dudu padha baku utawa ora bakuné basa. Bedané, basa kuwé dideleng saka variasi dhialèké pas karo kaanan dhaerahé dhèwèk-dhèwèk. Angger dhialek lan fungsiné sing adi basa ssrawungan nduwèni drajat sing padha, saka sawijiné dhialèk sing lewih apik utawa dhuwur drajaté. Ingatasé kuwé, tegalan duwé katetepan sajroné pangucapané. Contoné

tembung *lara* tetep diwaca /lara/, dudu /loro/ kaya pangucapané masrakat Yogyakarta utawa Solo. Apa sebabé? Tembung *loro* saluguné duwé arti 'dua', sedheng *lara* artiné 'sakit'. Kuwé arti sing sipaté umum kanggo uwong Tegal.

Conto liyané sing mesih pelafalan *fonetis* [a] diwaca kaya hurup /o/. Bentukané tembung utawa *morfologiné* "Gatatkaca" diwaca /Gatatkaco/. Tapiné, wektu olih panambang /é/ utawa /né/ balik maning nganggo hurup /a/, dudu /o/. Dadi, tembung

"Gatatkacané" diwaca

/Gatatkacané/,

dudu

/Gatatkacoané/.

Tegasé kiyé bab sing ora teteg sing ora ana ning masrakat wetanan

nganggokna hurup [a].

Kiyé

mesthiné

beda adoh

karo uwong

Tegal, hurup

[a] tetep

diwaca /a/,

hurup [o] ya

diwaca /o/.

Dadi, basa

tegalan kuwé dudu

basa ngapak-ngapak.

Uwong sing ngomong tegalan

ngapak-ngapak kuwé artiné uwong

sing kurang plesiran. Gogoh budaya gèn dadi

ngerti. Basa Tegal beda karo ngapakkuwé

Banyumasan. Khasé basa Tegal malah

kepengaruh basa Sundha. ☺ Lanang setiawan



Ngomong tegalan apa ora malah ngisin-isini? Jaré pèrangané uwong, basa tegalan kuwé kasar, cruwek alis saru tur wagu. Paling banter kur kanggo gojègan alias guyonan thok. Adhuh! kayong nelangsa nemen dadi wong Tegal?

Poligami Raja-Raja ing Tanah Jawa

Dening: Irul S Budianto

Prakara poligami sejatine ora mung rame utawa dadi pirembungan gayeng ing wektu saiki. Ing jaman biyen, luwih-luwih ing jaman kraton sing jenenge poligami kaya-kaya ora bisa dipisahake karo raja.

Mau kaya-kaya mujudake sawijining *konvensi* sing ora bisa dibantah maneh. Lan ing kanyatane poligami uga ditiru dening kaum bangsawan liyane.

Senajan konsep poligami dinut dening raja-raja ing tanah Jawa, nanging ing sajeroning perkembangane prakara mau luwih akeh dumadi ing jaman Mataram Islam. Wiwit Dinasti Mataram dibangun dening Panembahan Senapati, konsep poligami sansaya ndadi. Luwih-luwih ing jaman pemerintahane Sultan Anyakrakusuma, poligami kayadene dadi tradhisi kultur sing dibangun dening raja lan para bangsawan.

Miturut konsep pamawas Jawa, prakara poligami ing kanyatane uga mlebu ing wilayah abu-abu, sanjabaning akal sehate manungsa. Minangka conto kaya ing crita turun-temurun, Panembahan Senapati minangka cikal bakal Dinasti Mataram kanyatane nindakake poligami ora karo wanita biyasa, nanging karo makluk gaib, Kanjeng Ratu Kidul.

jenenge poligami asring dumadi nanging ora nate diprotes dening para kawula. Masalah iki saora-orane dilandhesi dening maneka bab sing nyengkuyung tindak-tanduke sang raja saprelu duwe selir akeh. Salah sawijining bab sing nyengkuyung konsep poligami mau merga ing keraton ditepungi anane konsep : *gung binathara bau dendha anyakrawati lan ber budi bawa leksana ambeg adil paramarta*. Lire, sakloron konsep mau sing njalari sawijining raja bisa nindakake apa wae. Klebu yen kudu duwe selir akeh.

Konsep *gung binathara bau dendha anyakrawati* mengku teges sawijining raja kudu dimaknani minangka pawongan kayadene dewa sing nyekel ukum lan nguwasani donya. Dene, *ber budi bawa leksana ambeg adil paramarta* mengku teges yen sawijining raja kajaba duwe panguwasa sing tanpa wates uga duwe budi luhur lan welas asih mring sasama.

Sakloron konsep sing dadi gondhelane raja mau pancen kudu imbang. Ora kena bot sih. Mula saka kuwi yen bab iki bisa ditindakake njalari eksistensine raja bakal dikultusake lan ora nate *diongrah-onggrah* dening kawulane. Kanthi mengkono dudu tembung keladuk yen samengkone

RAJA minangka panguwasa tunggal lan kaum bangsawan liyane. Ora tanggung-tanggung, poligami sing ditindakake raja nganti puluhan utawa atusan cacahé.

Nut lakuning sejarah keraton ing tanah Jawa, luwih-luwih nalika jaman Praja Mataram Islam, sing jenenge poligami kaya-kaya dudu barang wadi maneh. Luwih-luwih tumrape raja, poligami pancen ora bisa dipisahake saka tata panguripane minangka panguwasa. Malah ana tetembungan, raja sing ora nindakake poligami utawa duwe bojo akeh (selir) malah diarani dudu raja sejati.

Karo maneh, ing jaman keraton biyen, lumrahe raja pancen kudu duwe selir akeh. Bab

Konsep Gung Binathara

Ing jamane raja-raja Jawa sing





Para Putri Kraton Jawa



Raja Jawa ing Masa Kolonial

donya bakal dadi duweke raja. Kalebu ing njerone para wanita sing bisa diregem kanthi gampang.

Murih bisa dadi sawijining raja sejati sing duwe panguwasa tanpa wates biyasane isih ditambah kanthi maneka kaluwihan sing diduweni, kayata pusaka lan selir sing akeh. Kanthi selir akeh mau bakal ndadekake raja bisa diarani minangka *man power*. Nanging sing luwih penting saka selir akeh iki sejatine raja pengin antuk keturunan sing becik minangka panyengkuyung panguwasane.

Konsep poligami ing njero kraton sejatine uga ora mutlak minangka pepenginanane raja wae. Suwalike, para wanita ing jaman biyen ing kanyatane akeh sing ngarep-arep bisa digarwa dening raja senajan mung minangka *garwa ampil* utawa selir. Kekarepane

para wanita mau ora tanpa alesan, nanging ngarah marang kauntungan sing pengin direngkuh.

Kauntungan mau bisa ing babagan sosial, politik lan ekonomi. Sacara sosial, wanita sing didadekake garwa sawijining raja cetha bakal ngangkat statuse. Saka kalangan biyasa bisa dadi kaum bangsawan kanthi konsep *nunut mulya* sing dilakoni. Dene sacara politik, keturunanane mengko cetha bakal nut statuse raja. Dadi kulawarga bangsawan lan sabanjure bakal nglungguhi kursi pamarentahan sing diparingake sang raja. Dene sacara ekonomi cetha banget kanthi dipundhut garwa raja njalari samubarange bakal sarwa kecukupan.

Geneya para wanita gelem didadekake selir sekirane uga ora bisa dipisahake karo budaya sing ana. Awit budaya Jawa ing jaman biyen ing prakteke asring nglungguhake wanita ing sangisore para priya, sing ing

perkembangane nyungulake tetembungan wanita mung minangka *kanca wingking* utawa eksistensine mung saderma *swarga nunut neraka katut* tumrape priya.

Tumrape sawijining raja sing nindakake poligami utawa duwe selir akeh bisa uga minangka upaya kanggo njunjung eksistensine. Ing konsep pamawas iki raja sing duwe selir akeh bisa wae mengku tujuan minangka upaya kanggo nambah panguwasane. Minangka conto asring ditemoni raja sing nindakake perkawinan politik saprelu kanggo nylametake utawa malah kanggo njembarake panguwasane.

Wiwit Dinasti Mataram dibangun dening Panembahan Senapati, konsep poligami sansaya ndadi. Luwih-luwih ing jaman pemerintahane Sultan Anyakrakusuma, poligami kayadene dadi tradhisi kultur sing dibangun dening raja lan para bangsawan.

Wong Jawa Nang Jawane

Nilai-nilai Jawa pancen ngandhut tuntunan kanggo nylarasake urip lan panguripan sing serasi lan harmoni. Nanging krana perkembangane jaman, nilai-nilai Jawa mau saiki kaya-kayane wis luntur.



IKI yen ora gelem diarani ilang saka satengah-tengahe bebrayan utawa masarakat pendhukunge dhewe. Saka lunture nilai-nilai Jawa mau njalari akeh kang padha ngarani yen wong Jawa wis ilang Jawane.

Kanggo negesi wong Jawa ilang Jawane sejatine dudu perkara gampang. Akeh bab sing gegayutan karo tetembungan mau. Ing antarane magepokan karo bebrayan Jawa sing wis ora nduweni jatidhiri minangka wong Jawa. Jatidhiri mau ing antarane dumadi saka etika, moral, norma lan sapanunggalane sing kabeh mau kudu dijunjung dhuwur. Minangka dhasar pidakan jroning nepusi urip lan panguripan.

Kudu diakoni, wong Jawa wiwit jaman biyen nganti saiki sing isih nggondheli kanthi teguh nilai-nilai Jawane, pranyata bisa mbangun interaksi sosial masarakat kanthi becik, rukun lan guyup. Awit, kanthi nilai-nilai Jawa sing ing antarane arupa bisa ngrumangsani, tepa slira, budi pekerti, etika, tata krama lan sapanunggalane bisa ngawekani anane intrik-intrik utawa masalah ing satengahe bebrayan.





Jumbuh karo perkembangane jaman sing njalari lunture nilai-nilai Jawa sejatine ora mung winates anane sebutan wong Jawa ilang Jawane sing gegayutan karo wong Jawa sing wis ora nduweni jatidhiri Jawane. Nanging luwih saka iku, wong Jawa ilang Jawane bisa uga diarani minangka lunture *kabudayan*, tata susila, etika, norma lan sapanunggalane sing kabeh mau njalari anane bab-bab sing ora nyenengake sacara sosial kemasarakatan. Luwih saka iku malah jumurung ndadekake wujud kaprihatinan sing dirasakake dening wong akeh.

Ndhobrak Pakem

Wong Jawa ilang Jawane ing ndalem perkembangane kaya-kaya malah ndhobrak pakem uripe wong Jawa sing ngutamakake konsep adhem ayem. Kanthi mangkono, wong Jawa ilang Jawane tumrape wong Jawa sing ninggalake nilai-nilai Jawane bakal ndadekake saben pawongan tumindak sakarepe dhewe. Mung mentingake dhiiri pribadhi lan nyepelekake kepengingane liyan. Yen wis ngono, sing jenenge norma utawa tatanan sing ana sansaya ora karuwan. Intrik-intrik utawa masalah kayadene bom wektu sing sawanci-wanci bisa mbledhos.

Amarga lunture nilai-nilai Jawa sing kebak tuntunan mau cetha lamun bakal

njalari saben pawongan duwe patrap lan tumindak sakarepe dhewe. Akibatane bisa dibadhe, bab mau bakal nyumet anane 'ketegangan-ketegangan' sing ora dibayangake sadurunge. Tuladhane, ing panguripan saiki, ing antarane ditengeri kanthi anane wong-wong sing gampang kasulek ego lan nepsune sing sabanjure bakal tumindak sakarepe dhewe. Kayata kanthi ana lan ngrembakane karusuhan sing kadhang kala mung didhasari dening perkara sepele.

Kabeh mau bisa dijupuk dudutan menawa anane karusuhan, bentrokan lan sajinise satemene mung krana saben pawongan wis ora bisa maneh ngendhaleni dhiiri pribadhi. Iki beda adoh menawa saben pawongan isih lan tetep nggondheli konsep lan nilai-nilai Jawa mesthi samubarang tumindake bakal bisa dikendhaleni. Sabanjure sing jenenge karusuhan, bentrokan lan liya-liyane mesthi ora bakal dumadi.

Yen diulur luwih dawa maneh, wong Jawa ilang Jawane ing kanyatane uga nemahi marang patrap lan tumindak liyane. Kayadene ing wektu saiki sing asring gawe abange kuping yaiku perkara ngrembakane kasus korupsi utawa tumindak asusila liyane sing kaya-

Grup Kesenian Rakyat Kabupaten Karanganyar

kaya dadi pirembungan ora ana entek-enteke lan penangananane isih adoh saka kekarepan. Kabeh mau mujudake bukti menawa sing jenenge etika, moral, sopan santun lan nilai-nilai Jawa liyane wis ora dicekel maneh lan dadi tuntunan ing panguripane.

Unen-unen wong Jawa ilang Jawane ing kanyatane uga wis ngowahi budaya lumintu dadi budaya instan. Tegese, wong saiki sing ora gondhelan konsep lan nilai-nilai Jawa luwih jumurung nindakake samubarang kanggo kepentingan sing sipate mung sedhela lan kanggo mburu butuhe dhewe. Kayata anane kasus korupsi sing ora sansaya suda nanging malah sansaya ndadra cetha mung kanggo mburu butuhe dhewe. Ora nate mikirake kulawarga, anak lan keturunan sing bakal nampa wirang. Lan iki beda adoh karo jaman leluhur biyen, jroning nindakake samubarang luwih nengenake lan mikirake kanggo anak keturunane murih bisa ngrasakake enak lan kepenake ing tembene.  Irul S Budiyanto

Ngambak Dalan Padhang

(Dhandhanggula)

Anggitane: Bambang Edy Supriyono

1

Manut wirasane sabda suci
Bakal teka jaman sarwa ala
Manungsa bubrah lakune
Tan wanuh bener lan luput
Tan preduli ala lan becik
Remen nilar paugeran
Mburu nepsunipun
Kathah tyang kang samya tega
Datan emut pinangka titah kinaji
Supe jejering jalma

2

Awya ngungun, dhuh mitra kinasih
Ndulu jagad ing jaman wekasan
Saya ndadra tumindake
Datan wruh dalan satuhu
Samya nguja katoging ati
Mring Gusti datan ajriha
Pangadilan-ipnu
Nging begja ingkang waspada
Klayan emut mring wedharing sabda suci
Basuki gesangira

3


Emutana bab kraharjan jati
Sanes pangkat sanes bandha donya
Sanes raga saubube
Nadyan eca satuhu
Nging tan bisa amitayani
Endah mung sawatara
Kawontenanipun
Dene kraharjan punika
Cekap murwat ayem tentrem trusing ati
Kawujud srana iman

4

Pamrayogi menawi tinampi
Murih endahipun patunggilan
Ingkang cetha paedahe
Tunggal sedya wah rukun
Lung tinulung lilaning ati
Sami dene angreksa
Mring sesaminipun
Samya asih asuh asah
Tanpa mawang prabedan jejering jalmi
Mangun endahing gesang

5

Ngupadi mring dalan urip yekti
Nora ngalor ngidul ngulon ngetan
Mung ing iman panggonane
Tegese iman yeku
Klayan eklas manembah Gusti
Datan wegah ngibadah
Tan wedi pangridhu
Madhep mantep ing piwulang





Gerabah koleksi Soerapto, Foto: E & O

Mbabar tresna mring sapepadhaning urip
Ndhedher winih kaswargan

6

Ngambah gesang ing pepadhang jati
Wonten tiga kedah den upaya
Murih saged kawujude
Wosing pepadhang yeku
Namung becik leres lan adil
Becik ateges endah
Tan saru dinulu
Dene leres sampun cetha
Datan lepat, wah adil punika yekti
Pana raosing driya

7

Wonten siyang ugi wonten ratri
wonten bingah ugi wonten sisah
Kados sampun salimrahe
Wondene werdinipun
Ampun ngantos cupet penggalih
Dimen sageda sabar
Narimah ing pandum
Uger tansah mbudidaya
Datan kema meminta welasing Gusti
Kantun nengga sih rahmat

8

Wonten malih punika prayogi
Mbudidaya murih saged tansah
Ngraos sokur sawontene
Raos sokur puniku
Nelakaken eklasing galih
Datan kumedah kedah
Mbujeng ingkang klentu
Dene rejeki punika
Sampun mesthi cumadhang ing saben wanci
Nengga tyang kang makarya ☺

Clering / Jepara, 17022017



Aja Nggege Mangsa



Menawa ditilik saka
tembung-tembunge,
unen-unen kang dumadi
saka telung tembung iku
ngemu teges pepenget,
katitik saka panggunaning
tembung “aja”.

DENE, menawa ditegesi mbaka
satembung, *aja* ateges 'prentah supaya
ora nglakoni utawa nindakake', *nggege*
saka tembung lingga *gege* kang ateges
'nyepetake', lan mangsa ateges 'wektu,
wayah'. Menawa ditegesi, unen-unen *aja*
nggege mangsa ateges 'aja nyepetake
wektu'. Ananging, sejatine unen-unen
iku ngemu teges kang jero gegayutan
karo sikap ing sajroning urip minangka
pribadi, mhluk sosial, lan abdine Allah.

Unen-unen kasebut minangka ngemu
teges, menawa duwe karep utawa
panjangka kudu bisa meper hawa nepsu
lan ora ngaya murih ora kepleset ing
tumindak kang ora bener. Murih bisane
kelakon kang dijangka, samesthine kita
mbudidaya kanthi linambaran
nyenyuwun marang Gusti Allah.  narti

Sumber wacan *Gusti Ora Sare*

Kagem nambah bobot Majalah Swaratama, sumangga sami nyerat kritik, uneg-uneg lan sedaya pangarep-arep, dipun kentun kemawon wonten alamat e-mail: majalah.swaratama@gmail.com. Serat ingkang saged kapacak bakal pikantuk bebungah arupi gift menarik. Red.

Anggaran Ditambahi

Pitakonan:

Nyuwun pangestunipun kemawon, mugu-mugu ing wekdal salajengipun anggaran kangge penerbitan majalah *Swaratama* dipuntambahi agengipun. Kanthi makaten majalah *Swaratama* saged terbit langkung kathah malih.

Ageng Mangir

Jatinom, Bantul

Wangsulan:

Maturnuwun, mugu dedonga menika enggal saged dipun wujudaken. - red.

Pengaruh Karya Liyane

Pitakonan:

Arep takon, yen gawe karya sastra anyar adhedhasar karya sastra liyane kang wis terbit kuwi dhasar hukume kepriye? Upamane aku gawe naskah kethoprak adhedhasar novel sejarah. Matur nuwun.

Eko Purwanto

Prenggan, Kotagede

Wangsulan:

Manawa ing tulisan ilmiah kudu ditulis sumber tulisane. Wondene, ing sastra saka pamawas redaksi durung ana paugerane kang gumathok. Nanging, luwih prayoga ana tulisan utawa katrangan yen naskah kuwi diangkat saka novel kasebut. -red.

Kaping Kalih Sewulan

Pitakonan:

Pitakonanku prasaja wae. Umpama naskah sastra wis dimuat ana ing salah sawijining media massa, lan dibenakake maneh banjur dikirim ing media liyane, apa dikeparengake?




Sri Zumaini

Solo

Wangsulan:

Ing mancanegara, bab pemuatan dobel ana sing wis isa nampa lan dikeparengake. Nanging tradisi pemuatan tulisan ing kalawarta Indonesia isih nggunakake azas "eksklusivitas," biasane ora dikeparengake pemuatan dobel. -red.





Supatane Begawan Sukra

7

DENING BANUARI AMBARDI

DENAYAN NYAR TAKAKE LELAKON
SING MENTAS DIALAMI MARANG
BEGAWAN SUKRA.

RAMA ORA NGIRA
BABAR PISAN, YEN KO-
WE NGALAMI LELAKON
KANG NRENYAHKE...

NAMPA PANGINA
SANA
SARMISTHA.

MENAWI SAESTU
MAKATEN... TENTUNIPUN
UGI SAGET MINANGKANI
PANYUWUN KULA LI-
MANTAR KANTENG RAMA.

SUMURUPA...
SING DIKANDHAK-
AKE SARMISTHA
ORA BENER.

NAMPA BEGATNE
RAMA KI, KANGSEP MI-
NANGKI TANGAYOMANING
PRIBU WRESAPARWA.

SARTA WENANG
MURBA-WASESA
RAJA-DARBEKE
SANG NATA.

KOWE DUWE
PANYUWUN
APA?

PANYUWUN KULA,
DEWI SARMISTHA KEDAH
TANSAH LELADI DHATENG
KULA - NGANTOS DUMUGI
KULA NAMBUT SILANING
AKRAMA.

7



Mangka nyata wicarane sepet madu
Sesadone adu manis
Memanis yen gumuyu
Ayu rahayu ning dhiri
Widagda nganggit lelakon

(Cuplikan Tembang Megatruh)

Tegesipun

Wicarane nyatane manis.
Menawa guneman karo wong liya uga manis.
Apa maneh yen ngguyu.
Ayu lan keslametan ing awake.
Pinter anggone tumindak.

